

張氏景岳全書

江蘇王宜之
署簽

發背四十二

發背屬督脉膀胱經凡陰虛火盛或醇酒厚味或鬱怒房勞或丹石執毒皆能致之若腫赤痛甚脉洪數而有
力者熱毒之證也為易治若漫腫微痛色暗作渴脉雖洪數而無力者陰虛之證也為難治若不腫不痛或漫
腫色暗脉微細者陽氣虛甚也尤為難治大抵發背之證其名雖多總惟陰陽二證為要若發三頭或二頭其
形焮赤腫高發熱疼痛頭起者為癰屬陽易治若初起一頭如粟不腫不赤悶痛煩躁大渴便秘睡語咬牙四
五日間瘡頭不計其數瘡口各含如栗形如蓮蓬故名蓮蓬發積日不潰按之流血至數日或八九日其頭成
片所含之物俱出通結一衣揭去又結其口共爛為一瘡其膿內攻其色紫暗者為疽屬陰難治且此證不可
大痛又不可不痛若見煩悶者多不治總之瘡瘍雖云屬火然未有不有陰虛而致者故經云督脉經虛從腦
而出膀胱經虛從背而出故不可專泥於火

陳良甫曰背疽之源有五一天行二瘦弱氣滯三怒氣四腎氣虛五飲冷酒食炙煨服丹藥

立齋曰大抵發背之證雖發熱疼痛形勢高大煩渴不寧但得脉息有力飲食頗進可保無虞其膿一潰諸證
悉退多有因膿不得外泄以致疼痛若用敗毒寒藥攻之反致誤事若有膿急針之膿一出苦楚即止膿未成
而熱毒作痛者可用解毒之藥亦有腐潰尺餘者若無惡證則投以大補之劑肉最易生亦無所妨惟忌腫不
高色不赤不焮痛脉無力不飲食腫不潰腐不爛膿水清或膿多不止皆屬元氣虛也為難治宜峻補之其或
膿血既泄腫痛尤甚膿水臭敗煩躁時嗽腹痛渴甚瀉利無度小便如淋乃惡證也皆不可治 又灸法曰予
常治發背不問日期陰陽腫痛或不痛或痛其但未成膿或不潰者即與灸之隨手取效或麻木者明灸之毒
氣自然隨火而散或瘡頭如黍者灸之亦效亦有數日色尚微赤腫尚不起痛不甚膿不作者尤宜多灸勿拘
日期更服甘溫托裏藥切忌寒涼之劑其有勢未定者或先用蘊藥圍之若用烏金膏貼患處尤妙凡入初覺

發背赤熱腫痛莫辨其頭者但以濕紙覆其上立候視之其紙有先乾處即是結頭也取大蒜切成片如三錢厚薄安於頭上用大艾炷灸之三壯換一蒜片痛者灸之不痛不痛灸至痛時方止最要早覺早灸為上一日二日十灸十活三日四日六七活五日六日三四活過七日則難為力矣若有十數頭作一處生者即用大蒜研成膏作薄餅鋪頭上聚艾於蒜餅上燒之亦能活也若背上初發赤腫一片中間有一片黃粟米頭子便用獨蒜切去兩頭取中間半寸厚者正安於瘡上灸十四壯多至四十九壯蓋如此惡證惟隔蒜灸及塗烏金膏有效又治法曰腫硬痛深脉實者邪在內也可下之○腫高焮痛脉浮者邪在表也宜托之○焮痛煩躁或咽乾火在上也宜瀉之○腫高或不作膿者邪氣凝結也宜解之○腫痛飲冷發熱睡語者火也宜清之○不作膿或不潰不斂者陽氣虛也宜補之○瘡肉不腐或積毒不解者陽氣虛也宜助陽氣○膿多或清者氣血俱虛也宜峻補之○脉浮大或濇而肌肉遲生者氣血俱虛也宜補之○右關脉弱而肌肉遲生者宜補脾胃○又諸毒治法曰如頭痛有表證者宜服人參敗毒散一二劑○如焮痛發熱脉數者用金銀花散槐花酒神功托裏散○如疼痛腫硬脉寔者以清涼飲仙方活命飲苦參丸○腫硬木悶疼痛發熱煩躁飲冷便秘脉沈寔者內踈黃蓮湯或清涼飲○大便已通欲其作膿宜仙方活命飲托裏散蠟蓉丸外用神異膏○如飲食少思或不甘美用六君子湯加藿香連進三五劑更用雄黃解毒散洗患處每日用烏金膏塗瘡口處俟有瘡口即用紙作撚蘸烏金膏絛入瘡內○若有膿為脂膜間隔不出或作脹痛者宜用針引之腐肉堵塞者去之若瘰癧肉腐動用猪蹄湯洗之○如膿稠或痛飲食如常瘰癧肉自腐用消毒與托裏藥相兼服之仍用前二膏塗貼○若腐肉已離好肉者宜速去之○如膿不稠不稀微有疼痛飲食不甘瘰癧肉腐遲更用桑柴灸之亦用托裏藥○若瘰癧肉不腐或膿清稀不焮痛者急服大補之劑亦用桑木灸之以補接陽氣解散鬱毒○嘗觀患疽稍重未成膿者不用蒜灸之法及膿熟不開或待腐肉自去則多致不救○大抵氣血壯實或毒少輕者可假藥力或自腐潰若怯弱之人熱毒中隔內外不通不行針灸藥無全功矣○此證若膿已成急宜開之否則

重者潰通臍腐爛筋骨若使透臍則不可治輕者延漬良肉難於收功因而不斂者多矣○又諸補治法曰若腫焮作痛寒熱作渴飲食如常此形氣病氣俱有餘也先用仙方活命飲後用托裏消毒散解之○漫腫微痛或色不赤飲食少思此形氣病氣俱不足也用托裏散調補之○不作膿或膿成不潰陽氣虛也托裏散倍加肉桂參芪○膿出而反痛或膿水清稀氣血俱虛也八珍湯○惡寒形寒或不收斂陽氣虛也十全大補湯晡熱內熱或不收斂陰血虛也四物加參朮作嘔欲嘔或不收斂胃氣虛也六君加炮姜○食少體倦或不收斂脾氣虛也補中益氣湯加茯苓半夏○肉赤而不斂血熱也四物加山梔連翹○肉白而不斂脾虛也四君加酒炒芍藥木香○小便頻數者腎陰虧損也加減八味丸○大抵瘡毒勢甚若妄用攻劑怯弱之人必損元氣因而變證者衆矣 又三證治法曰若初患未發出而寒熱疼痛作渴飲冷此邪氣內蘊也仙方活命飲若口乾飲熱漫腫微痛此元氣內虛也托裏消毒散若飲食少思肢體倦怠此脾胃虛弱也六君子湯如未應加姜桂其有死者乃邪氣盛正氣虛而不能發出也在於旬餘之間見之○若已發出用托裏消毒散不腐潰用托裏消毒散如不應急宜溫補脾胃其有死者乃真氣虛而不能腐潰也在於二旬之間見之○若已腐潰用托裏散以生肌如不應急溫補脾胃其有死者乃脾氣虛而不能收斂也在於月餘見之此三證雖不見於經籍余嘗治而歷驗者

千金方灸法治發背已潰未潰者用淡豆豉以水和搗成硬泥依腫大小作餅三四分厚如已有瘡孔勿置瘡孔上但四布豆餅列艾其上灸之使微熱勿令破肉如熱痛急少起之日灸二度如先有瘡孔出汁即瘻一驗透臍法凡背疽大潰欲驗穿透內膜者不可用皂角散嚏法但以紙封患處令病者用意呼吸如紙不動者未穿透也倘用取嚏法鼓動內膜則反致穿透慎之慎之

都憲周弘岡背患疽腫而不潰脉大而浮此陽氣虛弱而邪氣壅滯也用托裏散倍加參芪反內熱作渴脉洪大鼓指此虛火也用前散急加肉桂脉證頓退仍用托裏而愈若以為熱毒而用寒藥則誤矣○上舍張克恭

患此內服外傳皆寒涼敗毒遍身作痛欲嘔少食晡熱內熱惡寒畏寒余曰遍身作痛營衛虛而不能營於裏也欲嘔少食脾胃虛寒而不能消化飲食也內熱晡熱陰血內虛而陽氣陷於陰分也惡寒畏寒陽氣虛弱而不能衛於肌肉也此皆由脾胃之氣不足所致遂用補中益氣湯諸證漸退更以十全大補湯腐肉漸潰又以六君子湯加芎歸肌肉頓生而愈○府庠彭碧溪患腰疽服寒涼敗毒之藥色暗不痛瘡頭如鋪黍背重不能安寢耳瞶目白面色無神小便頻澀作渴迷悶氣粗短促脉浮數重按如無余先用滋水之藥一劑少頃便利渴止背即輕爽乃砭出瘀血以艾半觔許明灸患處外傳烏金膏內服參芪歸朮肉桂等藥至數劑元氣稍復自疑肉桂辛熱一日不用手足並冷大便不禁仍用肉桂及補骨脂二錢肉豆蔻一錢大便復常其肉漸清更用當歸膏以生肌肉八珍湯以補氣血而愈○上舍蔡東之患此余用托裏之藥而潰瘡口尚未全斂時值仲冬且兼咳嗽余曰瘡口未斂脾氣虛也咳嗽不止肺氣虛也法當補其母一日與之同宴見忌羊肉之類余曰補可以去弱人參羊肉之類是也最宜食之遂每日不徹旬餘而瘡斂嗽亦頓愈矣○一男子年逾五十患發背色紫腫痛外皮將潰寢食不安神思甚疲用桑柴灸患處出黑血即斂腫覺而諸證如失服仙方活命飲二劑又灸一次膿血皆出更進二劑腫痛大退又服托裏消毒散數劑而斂夫瘡勢熾甚本宜峻劑攻之但年老血氣衰弱况又發在肌表若專於攻毒則胃氣先損必反誤事俱詳按

子長男於二週患背疽治按在腫瘍條中

新按

一論外通用方

神仙董照法

外一二三

腦疽四十三

立齋曰腦疽屬膀胱經積熱或濕毒上壅或陰虛火熾或腎水虧損陰精消涸所致○若腫痛未作膿者宜除濕消毒○大痛或不痛或麻木者毒甚也隔蒜灸之更用解毒藥○腫痛便秘者邪在內也宜泄之○不甚痛或不作膿者虛也托裏為主○膿成脹痛者針之更以托裏○上部脉數實而痛者宜降火○上部脉數虛而

痛者宜滋陰降火為主○尺部脉數而作渴者滋陰降火○脉數而虛細無力或膿清或不斂或膿多者大補血氣○不作膿或不潰者托裏藥主之○煩躁飲冷脉實而痛者宜瀉火 又治法曰初起腫赤痛甚煩渴飲冷脉洪數而有力乃濕熱上壅當用黃連消毒散並隔蒜灸以除濕熱○若漫腫微痛渴不飲冷脉洪數而無力乃陰虛火熾當用六味丸及補中益氣湯以滋化源○若口舌乾燥小便頻數或淋漓作痛乃腎水虧損急用加減八味丸及前湯以固根本而引火歸經○若不成膿不腐潰陽氣虛也四君加歸芪○若不生肌不收斂脾氣虛也十全大補湯○若色暗不潰或潰而不斂乃陰精消涸名曰腦爛為不治若攻補得宜亦有可愈○大凡腫焮痛甚宜活命飲隔蒜灸之以解散瘀血拔引鬱毒但艾炷宜小而少若欲其成膿腐潰生肌收斂並用托裏為主

李氏曰腦疽及頸項有疽不可用隔蒜灸恐引毒上攻宜灸足三里穴五壯氣海穴三七壯仍服涼血化毒之藥或以騎馬穴法灸之凡頸項咽喉生疽古法皆為不治若用此法多有生者如五香連翹漏蘆等湯國老膏萬金散皆可選用

見外科精要

一老人患此○赤腫痛脉數而有力與黃連消毒散二劑少退更與清心蓮子飲四劑而消○一男子腫痛脉數以荆防敗毒散二劑而痛止更以托裏消毒藥而消○一男子焮腫疼痛發熱飲冷脉洪數與涼膈散二劑而痛止以金銀花散四劑而潰更以托裏藥而愈○一老婦稟壯實潰而痛不止脉實便秘以清涼飲二劑而痛止更以托裏消毒藥而愈○一婦人冬間患此腫痛熱渴余用清熱消毒潰之而愈次年三月其舌腫大遍身發疔如葡萄不計其數手足尤多乃脾胃受毒也先各刺出血隨服奪命丹七粒出鼻汗瘡熱益甚便秘二日與大黃芩連各三錢升麻白芷山梔薄荷連翹各二錢生甘草一錢水煎三五沸服之大小便出血甚多下體稍退乃磨入犀角汁再服舌本及齒縫出血諸毒乃消更以犀角地黃湯而愈○一婦人患前證口乾舌燥內服清熱外敷寒涼色暗不覺胸中氣噎此內真寒而外假熱也彼疑素有痼火不欲溫補余以參芪

各五錢姜桂各二錢一劑頓潰又用大補藥而愈○一男子頭項俱腫雖大潰腫痛益甚兼作渴煩躁不睡飲食少思其勢可畏診其脉則毒尚在與仙方活命飲二劑腫痛退半與二神丸及六君子湯加五味子酸棗仁四劑諸證少退飲食少進睡亦少得又與麥冬白朮散數劑飲食頓進再與十全大補湯加金銀花白芷月餘而瘡薛按

耳瘡

四十四

立齋曰耳瘡屬少陽三焦經或足厥陰肝經血虛風熱或肝經燥火風熱或腎經虛火等因○若發熱焮痛屬少陽厥陰風熱用柴胡清肝散○若內熱痒痛屬二經血虛用當歸川芎散○若寒熱作痛屬肝經風熱用小柴胡湯加山梔川芎○若內熱口乾屬腎經虛火用加味地黃丸如不應用加減八味丸餘當隨證治之愚按薛氏所治耳證凡氣虛者以補中益氣湯加山梔黃芩血虛者用八珍湯加柴胡丹皮肝火血虛者用梔子清肝散怒動肝火者用加味逍遙散肝脾受傷者朝用加味歸脾湯暮用加味逍遙散此其治之大約也○予嘗治一儒者年近三旬素有耳病每年常發發必腫潰至乙亥二月其發則甚自耳根下連頭項上連頭角耳前耳後莫不腫痛諸醫之治無非散風降火至一月後稠膿鮮血自耳迭出每二三日必出一酒鐘許然膿出而腫全不消痛全不減枕不可近食不可加氣體俱困自分其危延余治之察其形氣已大不足察其病體則腫痛如舊仍若有餘察其脉息則或見弦急或見緩弱此非實熱可知然脉不甚緊而或時緩弱亦得潰瘍之体尚屬可治遂先以六味湯二三劑而元氣稍振繼以一陰煎加牛蒡子茯苓澤瀉仍倍加白蒺藜為君服五十餘劑外用降癰散晝夜敷治兩月而後愈蓋此證雖似潰瘍有餘而實以肝腎不足上實下虛一奇證也故存識之新按

鬚疽

四十五

立齋曰鬚疽屬肝膽二經怒火或風熱血虛所致○若焮痛或發熱者宜祛風清熱○焮痛發寒熱或拘急者

發散表邪○作膿焮痛托裏消毒○膿已成作痛者針之○不作膿或膿成而不潰者俱宜托裏○不斂或膿清者峻補之○又治法曰若發熱作渴者用柴胡清肝散○腫覺痛甚者仙方活命飲○若大勢已退餘毒未散用參苓歸朮為主佐以川芎白芷金銀花以速其膿膿成仍用參苓之類托而潰之○若欲其生肌收斂腎虛者六味丸血虛者四物加參芪或血燥者四物湯或水不能生木者六味地黃丸氣虛者用補中益氣湯皆當滋其化源為善

疔腮 四十六

立齋曰疔腮屬足陽明胃經或外因風熱所乘或內因積熱所致若腫痛寒熱者白芷胃風湯○內熱腫痛者升麻黃連湯○外腫作痛內熱口乾者犀角升麻湯○內傷寒涼不能消潰者補中益氣湯○發熱作痛大便秘結清涼飲○表裏俱解而仍腫痛者欲作膿也托裏散○若飲食少思胃氣虛弱者六君子湯○肢體倦怠陽氣虛弱也補中益氣湯○膿毒既潰腫痛不減熱毒未解也托裏消毒散○膿出而反痛氣血虛也參芪內托散○發熱晡熱陰血虛也八珍湯○惡寒發熱氣血俱虛也十全大補湯○若焮腫痛連耳下者屬手足少陽經當清肝火○若連頤及耳後者屬足少陰經虛火當補腎水○此證而有不治者多泥風熱執用剋伐之劑耳

瘰癧 四十七

瘰癧之病屬三焦肝胆等經風熱血燥或肝腎二經精血虧損虛火內動或恚怒憂思氣逆于肝胆二經二經常多氣少血故怒傷肝則木火動而血燥腎陰虛則水不生木而血燥血燥則筋病肝主筋也故累累然結若貫珠其候多生于耳前後連及頤頤下至缺盆及胸腋之側又謂之馬刀其初起如豆粒漸如梅李核或一粒或三五粒按之則動而微痛不甚久之則日以益盛或頸項強痛或午後微熱或夜間口乾飲食少思四肢倦怠或堅而不潰或潰而不合皆由氣血不足故往往變為癰癤外臺秘要云肝腎虛熱則生瘰癧病機云瘰

癰不係膏梁丹毒火熱之變總因虛勞氣鬱所致止宜以益氣養營之藥調而治之其瘡自消蓋不待汗之下之而已也若不詳脉證虛實之異而概用追蝕攻下及流氣飲十宣散之屬則必犯經禁病禁以致血氣愈損必反為敗證矣若脉洪大以元氣虛敗為不治若面色晄白為金剋木亦不治若眼內赤脉貫瞳人見幾條則幾年死使不求本而妄用伐肝之劑則誤矣蓋伐肝脾土先傷脾傷則損五臟之源矣可不慎哉

齊氏曰癰癰結核初覺時宜內消之如經久不除氣血漸衰肌寒肉冷或膿汁清稀毒氣不出瘡口不合聚腫不赤結核無膿外證不明者並宜托裏膿未成者使膿早成膿已潰者使新肉早生血氣虛者托裏補之陰陽不和託裏調之大抵托裏之法使瘡無變壞之證所以宜用也

丹溪曰癰癰必起於足少陽一經不守禁忌延及足陽明經食味之厚鬱氣之久曰毒曰風曰熱皆此三端拓引變換須分虛實寔者易治虛者可慮此經主決斷有相火且氣多血少婦人見此若月水不調寒熱變生稍久轉為潮熱自非斷慾食淡神醫不能療也

立齋曰癰腫脉沈數者邪氣寔也宜洩之○腫痛憎寒發熱或拘急者邪在表也宜發散○因怒結核或腫痛或發熱者宜疎肝行氣○腫痛脉浮數者祛風清熱○脉澀者補血為主○脉弱者補氣為主○腫硬不潰者補氣血為主○抑鬱所致者解鬱結調氣血○潰後不斂者屬氣血俱虛宜大補○虛勞所致者補之○因有核而不斂者腐而補之○脉寔而不斂或不消者下之○又治法曰若寒熱癰痛者此肝火風熱而氣病也用

小柴胡湯以清肝火並服加味四物湯以養肝血○若寒熱既止而核不消散者此肝經火燥而血病也用加味逍遙散以清肝火六味地黃丸以生腎水○若腫高而稍軟面色痿黃皮膚壯熱膿已成也可用針以決之及服托裏之劑○若經久不愈或愈而復發膿水淋漓肌肉羸瘦者必純補之劑庶可收斂否則變成久癰內經曰陷脉為癰留連肉腠即此病也外用豆豉餅琥珀膏以驅散寒邪補接陽氣內服補中益氣湯六味丸以滋腎水培肝木健脾土亦有可愈者○又治法曰大抵此證原屬虛損若不審虛寔而犯經禁病禁則鮮有不

誤○常治此證先以調經解鬱更以隔蒜灸之多自消如不消即以琥珀膏貼之○俟有膿即針之否則變生他處設若兼痰兼陰虛等證只宜加兼證之劑不可干擾餘經○若氣血已復而核不消却服散堅之劑至月餘不應氣血亦不覺損方進必效散或遇仙無比丸其毒一下即止二藥更服益氣養營湯以調理之○若瘡口不斂宜用豆豉餅灸之用琥珀膏貼之若氣血俱虛或不慎飲食起居七情者俱不治○然此證以氣血為主氣血壯寔者不用追蝕之劑彼亦能自腐但取去之亦使易於收斂○若氣血虛者不先用補劑而數用追蝕之藥適足以敗之也○若發寒熱眼內有赤脉貫瞳人者不治

災瘰癧法取肩尖肘尖骨縫交接處各一穴即手陽明經肩髃曲池二穴也各灸七壯在左灸左在右灸右左右俱病者俱灸之余常用之甚效薛氏以曲池云肘髃似亦未的也 又薛氏經驗方云治瘰癧已成未成已潰未潰者以手仰置肩上微舉起則肘骨尖自見即是灸處灸以三四十壯為度更服益氣養營湯灸三次瘡

自除如患三四年不愈者辰時灸至申時三灸即愈更服補劑此法乃單灸曲池以多為貴也然但用前法則已妙矣倘有未應者又當以此法治之○又曰此治瘰癧之秘法凡男子婦人若因恚怒傷肝氣血壅遏而不

愈者宜灸此穴以疎通經絡如取此穴當以指甲掐兩肘兩肩四所患處覺有酸麻方是其穴○又法灸瘰癧未成膿者用大蒜切片三錢厚安患處用艾壯於蒜上灸之每三五壯即換蒜再灸每日灸十數蒜片以拔鬱

毒如破久不合更用江西豆豉為末以唾津和作餅如前灸之以助陽氣內服補藥外貼琥珀膏或太乙膏瘡口自合○又或瘡口已破核不腐則瘡口不能斂或貼琥珀膏不應須用針頭散傳之以去腐肉再以如神散

傳之更服益氣養營湯若氣血虛者先服益氣養營湯待血氣稍充方用針頭散仍服前湯

一男子患面腫硬久不消亦不作膿服散堅敗毒藥不應令灸肩尖肘尖二穴更服益氣養營湯月餘而愈○一婦人久潰發熱月經每過期且少用逍遙散散前湯兩月餘氣血復而瘡亦愈但一口不收敷針頭散更灸

前穴而瘡常治二三年不愈者連灸三次兼用托裏藥必愈一婦人因怒結核腫痛察其氣血俱實先以必效

散下之更以益氣養營湯三十餘劑而消常治此證虛者先用益氣養營湯待其氣血稍充乃用必效散取去其毒仍進前藥無不效者○田氏婦年逾三十瘰癧已潰不愈與八珍湯加柴胡地骨皮夏枯草香附貝母五十餘劑形氣漸轉更與必效散二服瘡口遂合惟氣血未平再與前藥三十餘劑而愈後田生執此方不問虛實概以治人殊不知散中斑蝥性毒雖治瘰癧多服則損元氣若氣血實者先用此下之而投補劑或可愈若虛而用下藥或用追蝕藥瘡肉雖去而瘡口不合反致難治

俱詳按

治瘰癧痰核方 凡瘰癧初起未甚者即宜服此或加夏枯草更佳 用忍冬花蒲公英各四五錢以水二碗同煎湯朝夕代茶飲之十餘日漸消然此藥但可治標若欲除根必須灸肩髃曲池二穴

疔瘡

四十八

齊氏曰夫疔瘡者以其瘡形如丁蓋之狀者是也古方之論凡有十種華元化之論有五色疔千金方說疔有十三種以至外臺秘要神巧萬全其論頗同然皆不離毒氣客於經絡及五臟內蘊熱毒凡初生一頭凹而腫痛青黃赤黑無復定色令人煩躁悶亂或憎寒頭痛或嘔吐心逆以針刺瘡不痛無血是其候也多因肥甘過度不慎房酒以致邪毒蓄結遂生疔瘡內經曰膏梁之變足生大疔此之謂也其治之法急以艾炷灸之若不覺痛者針疔四邊皆令血出以奪命丹或回生丹從針孔縫之上用膏藥貼之仍服五香連翹湯漏蘆湯等劑疎下之為效○若或針之不痛無血者以猛火燒鐵針通紅於瘡上烙之令如焦炭取痛為效亦經前藥用膏藥貼之經一二日膿潰根出服托裏散湯依常療之以取平復○如針之不痛其人眼黑或見火光者不可治也此邪毒之氣入於臟腑故也○養生方云人汗入肉食食之則生疔瘡不可不慎也

立齋曰此證多由膏梁厚味之所致或因卒中飲食之毒或感四時不正之氣或感蛇蟲之毒或感死畜之穢各宜審而治之其毒多生於頭面四肢形色不一或如小瘡或如水泡或疼痛或麻木或寒熱作痛或嘔吐惡心或肢體拘急並宜隔蒜灸之痛則灸之不痛不痛灸之痛若灸而不痛則明灸之及鍼疔四畔去惡血以奪

命丹一粒入瘡頭孔內仍以膏藥貼之並服解毒之劑或用荊防敗毒散○若針之不痛無血者宜用燒鍼治如前齊氏之法○若不省人事或牙關緊急者以奪命丹為末葱酒調灌之候醒更服敗毒散或奪命丹甚效○若生兩足者多有紅絲至臍生兩手者多有紅絲至心腹生唇面口內者多有紅絲入喉皆為難治急宜用鍼於血絲盡處挑破使出惡血若紅絲近心腹者更挑破瘡頭去惡水以泄其毒亦以膏藥貼之多有生者○若患於偏僻下部之處藥力所難到者若專假葯力則緩不及事惟灸之則大有回生之功○疔之名狀雖有十三種之不同而治法但當審其元氣虛實邪之表裏庶不悞人於天札也若專泥於疎利表散非為無益而反害之○凡人暴死者多是疔毒急取燈照其身若有小瘡即是其毒宜急灸之并服奪命丹等藥亦有復甦者○又曰脉浮數者散之○脉沈實者下之○表裏俱實者解表攻裏○麻木或大痛及不痛者並灸之更兼攻毒

操江張恒山左足次指患之痛不可忍急隔蒜灸三十餘壯即能舉步彼欲速愈自敷涼藥遂致血凝肉死毒氣復熾再灸百壯服活命飲出紫血其毒方解脚底通潰腐筋爛肉甚多及將愈予因考續北上又誤用生肌藥反助其毒使元氣虧損瘡口難斂予回用托裏葯補之喜其稟質且客處至三月餘方瘡○表甥居富石手小指患之或用鍼出血數以涼藥掌指腫三四倍六脉洪大此真氣奪則虛邪氣勝則寔也先以奪命丹一服活命飲二劑勢稍緩余因他往或又遍刺出血腫延臂腕如大瓠手指腫大數培不能消潰乃真氣愈虛而邪氣愈甚也余回用大劑參芪歸朮之類及頻灸遍手腫勢漸消後大便不寔時常泄氣此元氣下陷以補中益氣湯加補骨脂肉苁蓉吳茱萸五味子又以生脉散代茶飲大便漸寔手背漸潰又用大補藥五十餘劑漸愈薛按

時毒 四十九

齊氏曰時毒者為四時邪毒之氣而感之於人也其候發于鼻面耳項咽喉赤腫無頭或結核有根令人憎寒

發熱頭疼肢體甚痛恍惚不寧咽喉閉塞人不識者將謂傷寒原夫此疾古無方論世俗通謂丹瘤病家惡言時毒切恐傳染經曰人身忽然變赤狀如塗丹謂之丹毒此風熱惡毒所為自與時毒不同蓋時毒者感四時不正之氣初發狀如傷寒五七日之間乃能殺人若至十日之外則不治自愈矣治宜辨之先診其脉凡滑數浮洪沈緊弦澹皆其候也但浮數者邪在表也沈澹者邪氣深也察其毒之甚者急服化毒丹以攻之寔熱便秘者大黃湯下之其有表證者犀角升麻湯以發之或年高氣鬱者五香連翹湯主之○又於鼻內噴通氣散取十餘噓作效若噓約不噓者不可治之如噓出膿血者治之必愈凡左右看病之人日日用噓藥噓之必不傳染切須記之其病人每日用噓藥五次以泄熱毒此治時證之良法也○凡經三四日不解者不可大下猶宜和解之以須角散芩連消毒飲甚者連翹湯之類至七八日大小便通利而頭面腫起高赤者可服托裏散托裏黃芪湯如腫甚者宜砭患處出惡血以泄其毒氣○此病若五日已前精神昏亂咽喉閉塞語言不出頭面赤腫食不知者必死之候治之無功矣然而此疾有陰有陽有可汗者有可下者嘗見粗工但云熱毒只用寒藥殊不知病有微甚治有逆從不可不審矣羅謙甫云泰和二年先師監濟源稅時四月民多疫癘初覺憎寒體重次傳頭面腫盛目不能開上喘咽喉不利舌乾口燥俗云大頭天行親戚不相訪問染之多不救張縣令姪亦得此病至五六日醫以承氣加板藍根下之稍緩翌日其病如故下之又緩終莫能愈漸至危篤或曰李明之存心於醫可請治之遂請診視具說其由先師曰夫身半以上天之氣也身半以下地之氣也此邪熱客於心肺之間上攻頭目而為腫盛用承氣下之以瀉胃中之寔熱是誅伐無過也殊不知適其所至為故遂處一方用黃芩黃連味苦寒瀉心肺間熱以為君橘紅苦平玄參苦寒生甘草甘寒人參甘平瀉火補氣以為臣連翹鼠粘子薄荷葉苦辛平板藍根味苦寒馬勃白殭蚕味苦平行少陽陽明二經氣不得伸桔梗味辛溫為舟楫不令下行升麻柴胡苦辛以散表邪共為細末半用湯調時服之半蜜為丸噙化之服盡良愈因嘆曰

永久命曰普濟消毒飲

薛立齋曰此感四時不正之氣邪客心肺之間上攻頭目而為患與膏梁積熱之證不同硝黃之劑非大便秘定者不可用若不審其因不辨其表裏虛實而概用攻之必致有誤○裏實而不利者下之○表實而不利者散之○表裏俱實而不解者解表攻裏○表裏俱解而不消者和之○腫甚焮痛者砭去惡血更用消毒之劑○不作膿或不潰者托之○饑年普患者不宜用峻利之藥當審而治之○又治法曰若脉浮者邪在表也用葛根牛蒡湯犀角升麻湯人參敗毒散之類以發之○脉沈滯者邪在裏也用梔子仁湯五利大黃湯之類以下之○表裏俱病而腫不退者用犀角升麻湯甚者砭出惡血并用通關散嚙鼻內取嚏以泄其毒○表裏俱不解而內外俱實者防風通聖散○欲其作膿者用托裏消毒散欲其收斂者用托裏散此法最為穩當○常見饑饉之際芻蕘之人多患之乃是胃氣有損邪氣從之為患也故凡以凶荒勞役而患此者多宜安裏為主或用普濟消毒飲最善

一老人冬月頭面耳項俱腫痛甚便秘脉寔此表裏俱實病也與防風通聖散不應遂砭患處出黑血仍投前藥即應又以荆防敗毒散而瘰蓋前藥不應者毒血凝聚上部經絡藥力難達故也惡血既去其藥自效或拘用寒速寒及年高畏用硝黃而用托裏與夫尋常消毒之劑或不砭泄其毒專假藥力鮮不危矣○一男子頭面腫痛服硝黃敗毒之劑愈甚診之脉浮數其邪在表尚未解散用荆防敗毒散加玄參牛蒡子二劑勢退大半以葛根牛蒡子湯四劑而痊

薛按

肺癰肺痿五十

此證初起邪結在肺者惟桔梗杏仁煎為治此之第一方在新因三

齊德之曰肺五臟之華蓋也處於胸中主於氣候於皮毛勞傷血氣腠理虛而風邪乘之內感於肺也故汗出惡風咳嗽短氣鼻塞項強胸脇脹滿久久不瘥已成肺痿也○風中於衛呼氣不入熱至於營則吸而不出

所以風傷皮毛熱傷血脉風熱相搏氣血稽留蘊結於肺變成瘡疽○診其脉候寸口脉數而虛者肺痿也數而實者肺癰也若欲知其有膿但脉見微緊而數者未有膿也緊甚而數者已有膿也○肺痿之候久嗽不已汗出過度重亡津液便如爛瓜下如豕膏小便數而不渴渴者自愈欲飲者將瘥此由肺多唾涎而無膿者肺痿也○肺瘡之候口乾喘滿咽燥而渴甚則四肢微腫欬唾膿血或腥臭濁沫胸中隱隱微痛者肺疽也又聖惠曰中府隱隱微痛者肺疽也上肉微起者肺瘡也中府者穴名也是以候始萌則可救膿成則多死○又內經曰血熱則肉敗營衛不行必將為膿大凡肺瘡當欬嗽短氣胸滿時唾膿血久久如梗米粥者難治若嘔膿而不止者亦不可治其嘔膿而自止者將自愈其脉短而濇者自痊浮洪而大者難治其面色當白而反面赤者此火之剋金皆不可治○仲景曰上氣面浮腫肩息其脉浮大不治又加利尤甚

馬益鄉曰肺癰治法要畧先以小青龍湯一帖以解其風寒邪氣然後以葶藶大棗瀉肺湯桔梗湯葶藶湯

樞要

畧隨証用之以取膿此治腫瘍之例也終以內補黃芪湯以補裏之陰氣此治潰瘍之例也○又曰肺癰已破

入風者不治或用太乙膏丸服以搜風湯吐之若吐膿血狀如肺癰口臭他方不應者宜消風散入男子髮灰清米飲調下兩服可除

立齋曰凡勞傷血氣腠理不密外邪所乘內感于肺或入房過度腎水虧損虛火上炎或醇酒炙博辛辣厚味薰蒸於肺或欬吐痰涎汗下過度重亡津液皆能致之其候惡風欬嗽鼻塞項強胸脇脹滿呼吸不利咽燥作渴甚則四肢微腫欬唾膿血若吐痰臭濁膿血腥穢胸中隱隱微痛右手寸口脉數而實者為肺疽若唾涎沫而無膿脉數而虛者為肺痿也○又治法曰大抵勞傷血氣則腠理不密風邪乘肺風熱相搏蘊結不散必致咳嗽若誤用汗下過度則津液重亡遂成斯證○凡喘嗽氣急胸滿者表散之○欬嗽發熱者和解之○咳而胸膈隱痛唾痰腥臭者宜排膿散○喘急恍惚痰盛者宜平肺○唾膿脉短濇者宜補之○又治法曰若欬嗽

參芪補肺湯○俸僉食少有佐以參朮補脾湯○咳嗽痰壅者腎虛水泛也六味地黃丸○口乾咽燥者虛火上炎也加減八味丸○此證皆因脾土虧損不能生肺金肺金不能生腎水故始成則可救膿成則多死苟能補脾肺滋腎水庶有生者若專攻其瘡則脾胃益虛鮮有不誤者矣

陸司廳子春間咳嗽唾痰腥穢胸滿氣促皮膏不澤項強脉數此肺疽也蓋肺係在頂肺傷則系傷故牽引不能轉側肺者氣之本其華在毛其充在皮治以黃芪當歸川芎白芷貝母知母麥冬瓜蒌仁桔梗防風甘草兼以蠟礬丸及太乙膏治之膿盡脉濇而愈○一男子面白神勞欬而胸膈隱痛其脉滑數予以為肺癰欲用桔梗湯不信仍服表藥致欬嗽愈甚唾痰腥臭始悟乃服前湯四劑欬嗽少定又以四順散四劑而脉靜更以托裏藥數劑而愈○一男子欬嗽喘急發熱煩燥面赤咽痛脉洪大用黃連解毒湯二劑少退更以梔子湯四劑而安○一男子患肺痿欬嗽喘急吐痰腥臭胸滿咽乾脉洪數用人參平肺散六劑及飲童便諸證息退更以柴苑茸湯而愈童便雖云專治虛火常治瘡瘍喉腫疼痛發熱作渴及肺痿肺癰發熱口渴者尤效○一男子面赤吐膿發熱作渴煩燥引飲脈洪數而無倫次先用加減八味丸加麥冬大劑一服熱渴頓止即熟睡良久覺而神爽索食再劑諸證頓減仍用前藥更以人參五錢麥冬二錢五分五味二錢水煎代茶日飲一劑月餘而安此證面赤者當補肺腎面白者當補脾肺治者審之○一婦人素血虛發熱欬嗽或用痰火之劑後吐膿血面赤脉數其勢甚危此膿成而氣血虛也余用八珍湯以補元氣用桔梗湯以治肺證因得漸愈○一儒者患肺癰鼻流清涕欬吐膿血胸膈作脹此風邪外傷也先用消風散如亂髮灰二服而鼻利又用四君加芎歸及桔梗湯而愈後因勞役欬嗽吐膿小便滴瀝面色黃白此脾土不能生肺金肺金不能生腎水也用補中益氣湯六味地黃丸而愈○一僕年踰三十嗽久不愈氣壅不利睡卧不寧咯吐膿血甚虛可畏其主已棄矣余以寧肺散一服少愈再服而止大半乃以寧肺湯數劑而痊所謂有是病必用是藥若泥前散性澀而不用何以得愈

薛按

乳癰乳巖

五十一
有乳證當互察之
婦人門亦

立齋曰乳房屬足陽明胃經乳頭屬足厥陰肝經男子房勞恚怒傷于肝腎婦人胎產憂鬱損於肝脾皆能致之○若因暴怒或兒口氣所吹腫痛者宜疎肝行氣○焮痛發寒熱者發散表邪○焮腫痛甚者清肝消毒並宜隔蒜灸○未成膿者疎肝行氣○不作膿或不潰者托裏為主○潰而不斂或膿清者宜大補脾胃氣血為主○又治法曰若膿出反痛或作寒熱氣血虛也十全大補湯○俸倦口乾中氣虛也補中益氣湯○哺熱內熱陰血虛也八珍湯加五味子○欲嘔作嘔胃氣虛也補胃為主或用香砂六君子湯○食少作嘔胃氣虛寒也前湯加乾姜○食少泄瀉脾氣虛寒也理中湯或加人參附子○若勞碌以致腫痛氣血未復也八珍湯倍用參芪歸朮○若因怒氣以致腫痛肝火傷血也八珍湯加柴胡山梔○若肝火血虛而結核不消者四物湯加柴胡升麻○若肝脾氣血俱虛而結核者四君子加芍歸柴胡升麻○鬱結傷脾而結核者歸脾湯兼神效瓜蒌散○若為兒所吹而發腫焮痛須吮通揉散否則成癰矣若兼餘證亦當治以前法○若婦人鬱怒傷肝脾而結核不痒不痛一二載始潰者名曰乳巖最難治療又治法曰若忿怒傷肝厚味積熱以致氣不行竅不通乳不出則結而為腫為痛此陽明之血熱甚則肉腐為膿若膿一成即針出之以免遍潰諸囊之患○亦有乳之子隔有滯痰口氣焮熱含乳而睡熱氣所吹遂成腫痛於初起時須吮啞使通或忍痛揉散之失治必成癰患宜用青皮以疎厥陰之滯石膏以清陽明之熱甘草節以行污濁之血瓜蒌子以消腫導毒或加沒藥橘葉皂角針金銀花當歸更宜隨證消息加減而治仍用少酒佐之更用隔蒜灸之其效尤捷若有膿即針之否則通潰難於收斂

乳癰用蒲公英忍冬藤入少酒煎服即欲睡是其功也及覺而病安矣

見外科法

一婦人患乳癰寒熱頭痛與荆防敗毒散一劑更與蒲公英一握搗爛入酒二三盞再搗取汁熱服渾熱盡患處而消丹溪云此草散熱毒消腫核又散滯氣解金石毒之聖藥○一婦人左乳內腫如桃不痛色不變發熱